

Solamente Un Pida Papel?

Ora brùit i brùidehòm ta para dilanti pastor, kada un ta primintí “di keda fiel na bo den bon i den malu, den rikesa i pobresa, den salú i enfermedat...te morto separá nos di otro.” Ki un promesa solemne! Ki un responsabilidat serio! Matrimonio ta demandá nada ménos ku un entréga total di un persona na su kasá, bida largu.

Ma den nos komunidad tin kreensianan i práktikanan ku ta enemigu di matrimonio. Manera komehèin, pokopoko nan ta kome e fundeshi riba kua matrimonio ta establesé i ta destruí e institushon sosial ku Dios mes a inisiá den hòfi di Eden.

Un kreensia destruktivo awendia sigur ta e pensamentu ku no ta nesesario pa kasa; ku e úniko diferensia entre bibamentu i matrimonio ta un pida papel. “Nos stimashon ta basta fuerte ku nos no tin mester di un papel,” nan ta argumentá. Pa algun, matrimonio ta manera un washí bieu ku bo ta bandoná pa un aparato mas apropiá pa nos era moderno, bibamentu.

Segun pensamentu di hopi hende awendia, si un pareha ke kasa, esei ta bon. Ma si nan ta preferá biba ku otro sin kasa, esei tambe ta un alternativa aseptabel. Nos ta hañ’é masha normal.

Ma kiko nos Kreador ta pensa? Beibel ta prohibí TUR relashon seksual fuera di matrimonio. “Hui for di immoralidat ...e hende immoral pa peka kontra su mes kurpa” (1 Korintionan 6:18). “..esaki ta e boluntad di Dios...apstené boso di immoralidat seksual” (1 Tesalonisensenan 4:3). I despues di kasa, Dios ta prohibí adulterio, esta relashon seksual ku un otro persona fuera di bo kasá. “No kometé adulterio” (Eksodo 20:14) te ainda ta un di e Dies Mandamentunan. “Laga matrimonio wòrdu onrá pa tur hende, i laga e kama matrimonial ta sin mancha; pasobra Dios lo huzga fornikadónan i adúlteronan” (Hebreonan 13:4).

Nos ta rebeldiá kontra Dios Su reglanan. Nos ke sa ku nos ta mas sabí ku Esun ku a krea e ser humano i sa kon e por funshoná optimal! Nos ke sa ku nos por ignorá Dios Su mandamentunan i keda sin sufri e konsekuensiana di nos desobedensia. Ma Dios Su stèndèrt no ta kambia. **Maske nos ta haña bibamentu normal, Dios ketu bai ta yam’é “piká”!**

O si, hende bibá ke sa ku nan ta stima otro. Ma ta stimashon bèrdadero? Un hende ku no ta dispuesto di mara un laso permanente—bida largu—semper lagando porta habrí pa “stima” un otro, no sa kiko stimashon bèrdadero ta. Frankamente bisá, **esei ta egoismo—buskamentu di bo propio interes, na lugá di interes di esun ku bo supuestamente ta stima.**

Ta “stimashon” si nan ni tin e wes’i lomba pa primintí di keda fiel na otro? Ta “stimashon” ora un hòmber no ta dispuesto pa duna su frei su fam, hinkando e i su yunan den pèrtá ora e muri? Ki sorto di “stimashon” no ta dispuesto di firma i primintí públikamente ku nan lo stima otro te morto? Kon nos no por yam’é “stimashon” ora nos ta kòrda ku un kantidat grandi di hende bibá eventualmente ta haña un otro partner?

Ta komo sifuera hende ku ta bibá ta trose e promesanan matrimonial. Ta komo sifuera e persona bibá ta dispuesto pa primintí di stima i keda fiel solamente te ora nan haña un yùfrou mas bunita, òf un otro mener ku mas sèn. Ta komo si fuera nan ta primintí di keda fiel den bon, ma no den malu; den rikesa si, ma no den pobresa; den salú no ta problema, ma wanta kurpa si tin enfermedat. **Nan ta gaña nan mes ku nan ta stima otro!**

Bèrdat; no tur hende kasá ta stima otro. Ma di otro banda, si bo stima un persona, lo bo kasa kun’é, dediká bo mes n’é, sakrifiká p’é apesar di e problemanan boso por enfrentá den matrimonio...un entrega total, bida largu.

E diferensia entre bibamentu i matrimonio ta grandi. E ta e diferensia entre stimashon i egoismo, no solamente e diferensia di un pida papel.